

COLUMNA

Pettas clar resunan

SANDRO BUCHLI/FMR

Plaunsiu ha er il Gion davos capiu ed udiu: Igl onn 2021 ei igl onn giubilar dil poet da Laax Flurin Camathias: 150 onns di da naschientscha, 75 onns mort. Ah gie, quei ei quel che ha translatau «Clara Notg de Nadal» per romontsch. Gie-bein. Ah gie, quei ei quel che ha scret la poesia «La sera sper il Lag» «Fontaunas clar resunan». Exact.

Tgei che vala senz'auer: Camathias ha giu ses merets ed in engaschi nunstundenteivel per la cultura romontscha. El ei staus in profi, in dil fatg, ha scret nundumbrevilas caussas e cunzun sil camp cantic ei el enconuschents a biars. Ed ussa – suenter 2021 – aunc a daplirs, quei ch'ei super.

Las festivitads giubilaras per Flurin Camathias ein stadas pompusas e numerusas: In bi cudisch mellen rehamein illustraus ed ornaus, concerts da chors e solists naven da Mustér sur Breil entochen a Laax. Expositziuns ed installaziuns da var 10 artistas ed artists en tut ils treis loghens dallas activitads dil pater: Lavurs scientificas, bibliografias, visetas en 5 e dapli archiv nua che tut ei vegniu cavau neunavon da Flurin Camathias. In audio-guide per far ina spassegiada entuorn il Lag Grond, inspirau da Flurin Camathias. Fontaunas dil vitg che vegnan engravadas cun ina plachetta dad ina poesia dil poet. In teater da Flurin Camathias. In cuors da cuschnar cun receipts ord il temps da Flurin Camathias. Gie, perfin ina petta cun si in taccader dil Camathias datti. E gie, era jeu sun staus involvaus en quella «industria da cultura» – sco Adorno schess. Organisau ed orchestrau a moda grondiusa – Schau ora cups. Biala caussa.

La latta per giubileums ei uss aulta: taluisa stuess atgna-mein mintga poeta romontscha e mintga poet romontsch vegnir commemoraus!

Buccas nauschas pudessan ussa era metter en damonda la relaziun dalla fiasta giubilara pil poet Flurin Camathias



e sia impurtonza historica e litterara. Clar, el ha scret e translatau biaras poesias, mo ei deva era aunc auters «impurtonts», sch'ins vuless classificar: Per exempel il fuolavias per il romontsch Peider Lansel, il collecziunader Caspar Decurtins, senza quel desi insumma pauc da quei temps, ils poets Gion Cadieli ni era in Alfons Tuor. Era la recepziun da Camathias ha taxau e criticau il poet da Laax savens sco «memia sublimes» e ch'el hagi «idealissu» empau fetg sias figuras. Sias personas seigien designadas «memia idealas, memia bunas» (dad anflar tier Guglielm Gadola 1946). Ni lu pli tard: «Camathias Dichtung wird allgemein als «eine Region zu hoch» taxiert.»

Clar, ins sa era discuorer con bia senn ch'ei fa da «classificar» poets ed insumma litteratura. Mo tuttina: Ei capeta era che giubileums da scribents u scribentas romontschas van denteren en emblidanza, gest era ils davos onns, sco per exempel:

- Gion Deplazes havess festivau siu tschie-
navel onn da naschientscha igl onn 2018.

- Igl onn 2020 ein vargai 20 onns dapi la
mort digl autur Flurin Spescha.

- Il 150avel da Peider Lansel ei era pli u
meins ius en emblidanza igl onn 2013.

Aber: Las resursas personalas ein limi-
tadas, il temps ei scarts e magari
mauncan era las monetas ni igl interess.
Commemoraziuns dependan fetg dall'ini-
ziativa da singuls da nossa cara Patagonia.

Quels treis suranumni vessen minimum era meritau ina
petta – cun si in taccader.

Sandro Buchli, carschius si a Laax, ha scret sia lavur finala all'universitad sur da Camathias e finescha ussa sias retschercas da Camathias cun questa columna. Fun fact: Sch'ins tippa il cavazzin «Flurin Camathias» egl archiv dalla gasetta La Quotidiana pigl onn 2021, lura dat quei 50 resultats. Naven dils onns 1996 entochen ils 31-12-2020 ei quei totalmeins 126 resultats. Il davos concert commemorativ per Flurin Camathias ei ils 5 e 6 da mars 2022 en baselgia a Laax.